

Schnitzelpunk

Ausschnitte aus dem Programm 2015

Miar händ a gails Projekt – so richtig punkig halt
Mit Pöbalei und Alkohol und körperlicher Gewalt
Um d Biitrag vom Kanton – und dr Stadt müand miar no zanka
Miar wend jo nu vo beidna 80 000 Wolfram-Franka

Miar wärend gära fräch – gottsjämmerlich versaut
So dass dia brava Lüt grad us da Socka haut
Doch d Konkurrenz isch zgross – viel zhoch liit hür dia Latta
Vor allem dia vom Grüsel-Gerry stellt üs bös in Schatta

D Nati an dr WM – kickt und kämpft furd Katz
S isch Zit gsi, macht dr Hitzfeld amna neua Trainer Platz
Bir nögschta WM isch – dr Pokal zum griiffa noch
Jetzt redend jo dr Trainer und sis Team dia glichig Sproch

As git so gwüssi Thema – dia segend hür verbotta
Ma sölli druf verzichta, Extremischta go verspotta
Doch miar sind d Schnitzelpunks – miar wend drum do druf pfiiffa
Sägend nur ai Wort: Sonderjagdinitiative

D Jäger händs dänn schwär – will uf aimol händs
Doba am Calanda pitterbösi Konkurrenz
Doch Graubünda Fera – gönnt a jedem sina Fun
D Jäger könd dr Giachen ha, für d Wölf isch dänn dr Gian

Wie soll ma sich verhalta? – Miar händ das jetzt glaub gschnallt
Und gönd scho länger nümma ohni Pfefferspray in Wald
Und söttamiar am Wolf – vor dia hungrig Schnauza stürza
Könntamiar üs vorem Ändi immerhin no würza

Üssa Künschlernama – isch tammisiach a Hit
Doch in däm Löli-Tublikum tschäggtna d Hälfti nit
Drum hämmer wella wäxla – doch das isch abverhait
Dr Danuser hät dänn sinam Goof scho Munggipunggi gsait

Dr Renzo Bluamathal – wett Nationalrot wärda
Är dr gross Rhetorikstar vor Gott uf dära Ärda
Frühahner hätt är tänkt – Politik seg nid für jeda
Doch wänns jo nuch um Bchotwüschst goht, chan äch schon bien mitcheda

Dr unbestrittne Meister – vo grusliger Kultur
Mit Totaköpf und Aliens undra Bar im Westa z Chur
Bis jetzt häts niamert gwüsst – do packt aim z plutta Graua
Är heg schiins au a Bundesrötin ussem Fels-Berg ghaua

Us Ross wird gschwind mol Rind – und fallses Schimmelpura hetti
Gits a nöii Etiketta, alles isch paletti
Inhalt und Verpackig – so ischs in üssna Zitta
Müand bir Wurscht nüm zämmapassa, gseschs jo bir Conchita

Jeda Schwizer weiss – wär Ordng hät im Läba
Dä schiisst schön brav ins Loch, uf gar kai Fall drnäba
Suuberkeit isch z AA – und z OO in üssrer Wält
Und wens halt wüerkli dräckig isch, dänn wäschend miar au z Gäld.

Dr Oberkriager Blattmann – empfiehl us Notvorrot
Wenn d Hamsterkäuf mol losgönd, seis wohrschlich dänn scho z spot
Dr Gieri dä isch schlau – und weiss genau wias lauft
Drum hät är profilaktisch as Ruudel Hamster kauft

...

Dr Gion dä isch no schlauer – hät do as goldigs Händli
Är weiss genau, du bruchsch nu zwai, as Wiibli und as Mändli

Kürzlich in dr Nacht – sind miar vor Schreck verwacht
Schweissgebadet zitterig, händ fascht in d Hosa gmacht
Miar händ an Albtraum gha – und träumt dass dr Gottvatter
Sina Sessel ruma tei für üssa Seppli Blatter.

Los Glaserei Caduff – din Sex-Gäg isch verbii
Machs doch wia andri Gwärb in Chur, mit Witz und Phantasie
Dia geilschti Gschäftsideo – do lachsch di ächt kaputt
Hät mit ma „Tag der offnen Tür“ z'Bestattigsinstitut

Nach 3 Johr Schnitzelpunk – sind miar im Bündnerland
A kulturelli Institution und guat bekannt
Bim SRF a Talkshow – das wär dia nögschti Schwella
Doch mit üssna Hoor hät dr Schawinski üs nid wella